



VETERINARSKI FAKULTET SARAJEVO  
SARAJEVO

- SENAT -

Broj: 01-1299/16

Sarajevo, 24. 02. 2016. godine

|                           |               |                     |              |
|---------------------------|---------------|---------------------|--------------|
| PRISLUŠENJE: 04. 3. 2016. |               |                     |              |
| Članak 56. Statuta        | Klasifikacija | Članak 124. Statuta | Broj prijave |
| 01-02                     | 138           | 3                   | 16           |

Na osnovu člana 56. i člana 124. Statuta Univerziteta u Sarajevu Senat je, na 41. sjednici održanoj 24. 02. 2016. godine, d o n i o slijedeću

## ODLUKU

### I

Daje se *saglasnost* na Pravilnik o načinu provođenja kontinuirane veterinarske edukacije na Veterinarskom fakultetu Univerziteta u Sarajevu.

### II

Ova odluka stupa na snagu danom donošenja.

REKTOR

*Prof. dr. Muharem Avdispahić, dr. h. c.*



Dostavljeno:

- ⊙ Veterinarski fakultet UNSA
- Službi za nastavu
- u dokumentaciju Senata
- Arhivi

Univerzitet u Sarajevu  
Veterinarski fakultet Sarajevo

Na osnovu člana 70. Zakona o visokom obrazovanju Kantona Sarajevo - prečišćeni tekst (Službene novine Kantona Sarajevo 42/13; 13/15), člana 124. Statuta Univerziteta u Sarajevu, člana 70. Zakona o veterinarstvu BiH («Službeni glasnik BiH» 34/02), člana 115. Zakona o veterinarstvu FBiH (Službeni glasnik FBiH 46/00). Naučno-nastavno vijeće na svojoj II redovnoj sjednici održanoj 09.02.2016. godine donosi:

**PRAVILNIK O NAČINU PROVOĐENJA KONTINUIRANE VETERINARSKO  
EDUKACIJE (STALNOG VETERINARSKOG USAVRŠAVANJA) NA  
VETERINARSKOM  
FAKULTETU UNIVERZITETA U SARAJEVU**

**I Opšte odredbe**

**Član 1.**

Ovim Pravilnikom utvrđuju se oblici, način organizacije, nosioci, isprave, kontrola kvaliteta i evaluacija kontinuirane veterinarske edukacije (stalnog veterinarskog usavršavanja) na Veterinarskom fakultetu Univerziteta u Sarajevu.

**II Definicija, sadržaj, ciljevi kontinuirane veterinarske edukacije**

**Član 2.**

Kontinuirana veterinarske edukacija (KVE), u procesu cjeloživotnog učenja, obuhvata sve oblike poslijediplomske edukacije koji se organiziraju na Veterinarskom fakultetu Univerziteta u Sarajevu (VFUNSA) izvan redovnih dodiplomskih, postdiplomskih, specijalističkih i doktorskih studija, sa ciljem usavršavanja i dopunjavanja znanja, vještina i kompetencija doktora veterinarske medicine, kao i drugih stručnjaka koji obavljaju veterinarske ili srodne djelatnosti (javno zdravstvo).

### Član 3.

Kontinuirana veterinarska edukacija je zakonska obaveza i pravo svih doktora veterinarske medicine u Bosni i Hercegovini.

Kroz različite oblike kontinuirane veterinarske edukacije realiziraju se programi cjeloživotnog učenja i necikličnih oblika obrazovanja na VFUNSA. Odredbe ovog Pravilnika su usaglašene sa odredbama člana 70. Zakona o visokom obrazovanju Kantona Sarajevo i člana 124. Statuta Univerziteta u Sarajevu.

### Član 4.

Opšti ciljevi organizovanja kontinuirane veterinarske edukacije na VFUNSA su:

- organiziranje svih oblika KVE, uključujući savremene metode podučavanja i najnovije tehnologije, s ciljem obnove i razvoja temeljnih, općih veterinarskih i užih specijalističkih znanja i vještina;
- organiziranje stručnih skupova (seminara, kurseva, individualnog usavršavanja, edukacija edukatora) i organiziranje drugih oblika prenošenja znanja i informacija od značaja za KVE;
- omogućavanje sticanja certifikata (diploma) za samostalno izvođenje određenih postupaka, procedura i aktivnosti u okviru veterinarske struke;
- realizacija programskih ciljeva cjeloživotnog učenja na Univerzitetu u Sarajevu;
- analiza edukativnih potreba;
- evaluacija i unapređenje kvaliteta KVE;
- provođenje procedura za akreditaciju programa KVE;
- uključivanje u nacionalne i međunarodne sisteme KVE i interdisciplinarna saradnja, uključujući projekte iz oblasti KVE;
- provođenje naučnih istraživanja, objavljivanje publikacija i razmjena informacija iz oblasti KVE;
- informisanje i popularizacija KVE događaja;
- sve druge aktivnosti u vezi KVE .

## **III Organizacija Vijeća za kontinuiranu veterinarsku edukaciju Veterinarskog fakulteta Univerziteta u Sarajevu**

### Član 5.

Vijeće za KVE (u daljem tekstu VKVE) Veterinarskog fakulteta Univerziteta u Sarajevu organizuje i provodi kontinuiranu veterinarsku edukaciju, odnosno stalno usavršavanje doktora veterinarske medicine u saradnji sa svim kapacitetima VFUNSA, kao i u saradnji sa drugim fakultetima, zdravstvenim ustanovama, nadležnim ministarstvima i agencijama, strukovnim udruženjima, farmaceutskom i drugom industrijom i drugim zainteresiranim stranama.

## Vijeće za KVE Veterinarskog fakulteta UNSA

### Član 6.

Cilj rada VKVE-a je obezbjeđenje tehničkih, informatičkih i stručnih uslova za uspješno provođenje programa KVE. Radom VKVE-a rukovodi predsjednik Vijeća za KVE (u daljem tekstu predsjednik VKVE-a). Predsjednika VKVE-a imenuje Nastavno-naučno vijeće VFUNSA (u daljem tekstu NNV) na prijedlog dekana VFUNSA (u daljem tekstu dekan). Mandat predsjednika VKVE-a traje 2 godine i može se jednom obnoviti. VKVE razmatra i odobrava sve predložene programe KVE, te ih objedinjava u jedinstven Godišnji program KVE VFUNSA, kojeg odobrava NNV. Rad VKVE-a podliježe praćenju i provjerama kvaliteta od strane Odbora za osiguranje kvaliteta VFUNSA (u daljem tekstu ODOK). Predsjednik VKVE-a podnosi izvještaj o radu dekanu i NNV najmanje jednom godišnje.

### Član 7.

VKVE imenuje dekan na prijedlog NNV iz redova nastavnika VFUNSA. Svaka organizaciona jedinica VFUNSA predlaže po dva predstavnika u sastav VKVE-a. Mandat članova VKVE-a traje 2 godine i može se jednom obnoviti. VKVE donosi Poslovnik o radu Vijeća za kontinuiranu veterinarsku edukaciju kojim regulira način rada.

Sjednicama VKVE-a predsjedava predsjednik VKVE-a.

VKVE na prvoj konstituirajućoj sjednici imenuje zamjenika predsjednika VKVE-a, koji predsjedava radom VKVE-a u odsustvu predsjednika.

VKVE:

- predlaže NNV-u na usvajanje jedinstveni Godišnji program KVE VFUNSA na osnovu prijedloga pojedinačnih programa KVE,
- revidira, mijenja i dopunjuje Godišnji program KVE shodno potrebama,
- vrši evaluaciju realizacije i kvaliteta KVE,
- u saradnji s ODOK-om predlaže mehanizme i instrumente obezbjeđenja kvaliteta KVE i analizira ishode analize kontrole kvaliteta KVE, te predlaže mjere za unaprjeđenje kvaliteta KVE.

Predsjednik VKVE-a:

- predstavlja VKVE na nivou VFUNSA,
- u saradnji s dekanom kontaktira s udruženjima/komorama veterinarskih i drugih djelatnika u BiH i drugim institucijama/kompanijama zainteresiranim za KVE;
- organizuje rad VKVE-a (saziva sjednice, predlaže dnevni red i predsjedava),
- provodi odluke VKVE-a,
- podnosi izvještaje o radu VKVE-a dekanu i NNV-u,
- potpisuje akte koje je usvojilo VKVE,
- obezbjeđuje provođenje ovog Pravilnika,
- odgovara za svoj rad dekanu i NNV-u.

## IV Oblici i programi kontinuirane veterinarske edukacije

### Član 8.

VKVE organizira sve poznate i prihvaćene oblike KVE u vidu "živih" (live) događaja, online programa i trajnih (štampanih ili elektronskih) publikacija.

Najčešći oblici KVE su:

- tečajevi prve kategorije - sticanje novog znanja s provjerom,
- tečajevi druge kategorije - obnova znanja,
- tečaj osposobljavanja za određene procedure, metode, postupke i aktivnosti,
- e-learning tečajevi,
- simpoziji,
- stručne radionice,
- predavanja,
- konsultacije,
- stručni sastanci,
- individualno usavršavanje,
- izdavanje štampanih i elektronskih nastavnih i promotivnih materijala,
- izdavanje stručnih saopštenja i pojašnjenja;

Programi se organiziraju slijedeći savremena dostignuća veterinarske nauke i prakse uz poštivanje etičkih principa.

### Član 9.

Kategorizacija i vrednovanje programa vrši se na osnovu kriterija uspostavljenih od strane relevantnih udruženja/komora veterinarskih i drugih djelatnika kao i ECTS-a (European Credit Transfer and Accumulation System). (Ovdje nisam siguran da li ovo ostaviti).

Učešćem u pojedinom obliku KVE polaznik/polaznica stiče:

- edukaciju iskazanu kroz broj sati teoretske i praktične nastave pohađane kroz program KVE, na osnovu kojih relevantna udruženja/komore veterinarskih i drugih djelatnika mogu vršiti bodovanje nophodno za licenciranje svojih članova; - certifikate o individualnom sticanju znanja i vještina u određenoj djelatnosti veterinarske i drugih relevantnih profesija;
- određeni programi KVE mogu se priznati doktorima veterinarske medicine na specijalizaciji kao dio obavljenog specijalistickog staža predviđenog za realizaciju na VFUNSA ili za upis na doktorski studij VFUNSA.

Predlaganje programa KVE

## Član 10.

Program KVE predlaže se VKVE-u u elektronskoj formi na posebnom obrascu (Obrazac za prijedlog Programa KVE VFUNSA). Program KVE mogu predlagati nastavnici VFUNSA kao pojedinci, grupno u ime određene katedre ili kao zajedničke programe više katedri. Programi KVE mogu biti predloženi od strane više katedri sa različitih fakulteta i univerziteta, ali uvijek jedan od autora mora biti zaposlenik VFUNSA, koji u tom slučaju predstavlja kontakt autora. Prijave prijedloga programa KVE dostavljaju se VKVE-u na osnovu poziva upućenog od strane dekana. Poziv za slijedeću akademsku godinu se upućuje najkasnije do kraja decembra, a programi KVE se VKVE-u dostavljaju najkasnije do 1. februara tekuće akademske godine. Svi prijedlozi moraju biti razmatrani na VKVE-u u periodu od 30 dana od zaključenja poziva. Iznimno, prijave se mogu primiti i u drugo vrijeme u slučaju da druge zainteresirane strane zahtijevaju hitno prenošenje novih naučnih saznanja ili informacija iz veterinarstva. U takvim slučajevima se ubrzava proces usvajanja novog programa KVE, odnosno predjesnik VKVE-a direktno predlaže VKVE-u usvajanje novog programa KVE.

Jedinstveni Godišnji program KVE VFUNSA za narednu akademsku godinu VKVE dostavlja dekanu i NNV najkasnije do 15. marta tekuće akademske godine.

Nakon usvajanja od strane NNV-a, Godišnji program KVE VFUNSA se dostavlja Senatu UNSA na usvajanje pod nazivom „Godišnji program kontinuirane veterinarske edukacije (cjeloživotnog učenja) na VFUNSA za tekuću akademsku godinu“.

Jedinstveni Godišnji program KVE za narednu akademsku godinu, usvojen od strane NNV i Senata UNSA, treba biti realiziran u dotičnoj akademskoj godini, ovisno o iskazanim potrebama drugih zainteresiranih strana kao korisnika KVE .

Svi prijedlozi pojedinih programa KVE su, do konačnog prihvatanja, interni dokumenti VFUNSA koji ne smiju biti prezentirani ili objavljeni u cjelini ili u dijelovima .

## Član 11.

Obavezan sadržaj prijedloga programa KVE:

- ime voditelja programa i ostalih predavača s kratkim biografijama
- sažetak programa,
- datum, vrijeme i mjesto održavanja,
- profil, optimalni i minimalni broj polaznika,
- edukativni ciljevi,
- očekivani ishodi edukacije i stečene lične kompetencije polaznika (praktična i teoretska znanja i vještine, stavovi),

- eventualne koristi za instituciju/kompaniju iz koje dolazi polaznik KVE (npr. unapređenje preventivne i terapije bolesti, tehnička i tehnološka unaprjeđenja proizvodnog procesa, unapređenje sigurnosti i/ili kvaliteta hrane, učinkovitosti epidemioloških sistema nadzora i sl.) (opcijski),
- nastavne metode i tehnike,
- način provjere stečenog znanja i vještina,
- plan i program izvođenja (raspored nastave sa satnicom, nazivima tema i predavačima),
- potrebna oprema i nastavni materijal,
- finansijski plan (projekcija i izvor prihoda (visina kotizacije, donacije, sponzorstva, projekti); projekcija troškova),
- obavezna i dopunska literatura (opcijski).

Evaluacija i prihvaćanje prijedloga programa KVE

#### Član 12.

Opći uslovi za prihvatanje programa KVE :

- program je zasnovan na savremenim naučnim saznanjima, etičkim principima i općim stavovima VFUNSA,
- autori i predavači svojim naučnim i stručnim referencama dokazuju kvalificiranost i posjedovanje nastavnog iskustva u oblasti u koju spada predloženi program,
- najmanje jedan od autora programa je nastavnik VFUNSA,
- postoje štampani i/ili elektronski nastavni materijali koji se dijele polaznicima prije početka programa.

#### Član 13.

Na osnovu Poslovnika o radu Vijeća za kontinuiranu veterinarsku edukaciju, VKVE prihvata program KVE ili ga vraća autorima na doradu, uz jasne preporuke za poboljšanje prijedloga.

U slučaju da Vijeće ne može da donese odluku o prihvatanju ili vraćanju programa na doradu, predsjednik Vijeća pismeno izvještava Kolegij VFUNSA koji donosi konačnu odluku.

Odobreni program može se ponoviti više puta unutar jedne akademske godine bez ponovnog prihvatanja od strane Vijeća.

#### Član 14.

Nakon usvajanja Godišnjeg programa KVE VFUNSA od strane Senata UNSA, predsjednik VKVE-a isti dostavlja nadležnim udruženjima/komorama veterinarskih i drugih djelatnika radi planiranja realizacije i bodovanja cjeloživotne edukacije svojih članova..

Obavijesti o programima KVE moraju biti objavljeni na internet stranici VFUNSA najmanje dva mjeseca prije početka školske godine.

#### Provođenje programa KVE

#### Član 15.

Svi programi KVE organizuju se i provode na osnovu usvojenog jedinstvenog Godišnjeg programa KVE VFUNSA.

Realizacija programa KVE započinje prijavom (online ili pismenom) predviđenog (minimalnog) broja kandidata.

Ukoliko se na više programa KVE ne prijavi dovoljan broj polaznika, predsjednik VKVE-a i autori programa evaluiraju razloge za nezainteresovanost polaznika i shodno tome donose zaključke. Analiza i zaključci sa prijedlozima dostavljaju se dekanu i NNV.

#### Član 16.

Nakon odobravanja jedinstvenog Godišnjeg programa KVE VFUNSA, voditelj programa KVE, zajedno sa članovima edukativnog tima (autori i nastavnici) obezbjeđuje provođenje plana i programa, izradu edukativnih materijala i njihovu autorizaciju, rukovodi provjerom stečenih znanja i vještina polaznika i evaluacijom kvaliteta programa KVE i sastavlja izvještaj o provedenom programu KVE, kojeg dostavlja VKVE-u

Provjera stečenih znanja i vještina



## Član 17.

Provjera znanja i usvojenih vještina za programe KVE u kojima je predviđena, vrši se na način i po metodama predloženim u samom prijedlogu programa, a shodno

U slučaju da jedan ili više polaznika određenog programa KVE nisu zadovoljni rezultatima provjere stečenih znanja i vještina, ti polaznici moraju podnijeti pismeni zahtjev za provjeru znanja putem komisijskog ispita. Takav zahtjev se podnosi predsjedniku VKVE-a u roku 24 sata od objave rezultata provjere znanja i vještina. VKVE je dužno da zahtjev za komisijsku provjeru znanja razmotri i donese odluku u roku od 7 dana od dana podnošenja zahtjeva, te u istom roku o odluci pismeno obavijesti podnosioca zahtjeva, voditelja dotičnog Programa KVE i dekana.

U slučaju odluke o provođenju ponovne provjere stečenih znanja i vještina, VKVE imenuje tročlanu ispitnu komisiju, te zakazuje komisijski ispit najkasnije u roku od 15 dana od dana podnošenja zahtjeva od strane kandidata. U sastav ispitne komisije se imenuje voditelj dotičnog programa KVE, kao i dva člana iz reda nastavnog osoblja VFUNSA iz oblasti iz koje je organiziran program KVE, od kojih jedan predsjedava ispitnom komisijom.

Rezultati provjere stečenih znanja i vještina pred ispitnom komisijom su konačni na koje polaznik KVE nema pravo žalbe.

Proces svake provjere znanja i vještina i njegovi rezultati sastavni su dio procesa kontrole i unapređenja kvaliteta KVE.

Po svakom završenom programu KVE, voditelj programa dostavlja VKVE-u izvještaj o realiziranom programu, koji minimalno mora uključiti relevantne podatke i pokazatelje vezano za nastavni i financijski aspekt kursa (član 11.), kao i aspekt kontrole kvaliteta (član 20.), te rezultate završne provjere znanja i vještina.

Predsjednik VKVE-a periodično (najmanje semestralno) podnosi izvještaj dekani i NNV o realizaciji jedinstvenog Godišnjeg programa KVE i rezultatima završnih provjera znanja i vještina.

Certifikati o završenom programu KVE.

## Član 18.

Svi polaznici i predavači dobijaju certifikate o učešću u programu KVE.

Za programe u kojima je predviđena provjera usvojenog znanja i vještina, potrebno je da polaznici uspješno završe predviđene provjere da bi dobili certifikate o uspješno završenom programu KVE. Polaznici ovakvih programa, koji predviđene provjere znanja i vještina ne završe uspješno, dobijaju certifikate o pohađanju programa KVE.

Za programe u kojima nije predviđena provjera usvojenog znanja i vještina, potrebno je da polaznici redovito pohađaju edukaciju da bi dobili certifikate (diplomu) o pohađanju programa KVE.

Nakon realiziranog domaćeg programa KVE, polaznicima i predavačima, izdaje se dvojezično uvjerenje-certifikat na bosanskom/hrvatskom/srpskom i engleskom jeziku..

Za međunarodne programe KVE certifikati se izdaju na engleskom jeziku.

Pozvani predavači dobivaju certifikat na kojem je naznačeno pozvani predavač (invited speaker).

Sadržaj certifikata:

- službeni naziv i logo VFUNSA. Ukoliko su drugi fakulteti, organizacije, ustanove ili udruženja suorganizatori, onda se na certifikat dodaju i njihova službena imena i logoi,
- naziv programa i oblik KVE, mjesto i datum(i) realizacije,
- ime i prezime polaznika ili predavača,
- izjava o broj časova teoretske i praktične nastave koja je pohađana (za sve programe KVE koji su planirani bez provjere stečenih znanja i vještina, odnosno za sve polaznike koji nisu položili provjere stečenih znanja i vještina planirane programom KVE),
- izjava o uspješnosti polaganja provjere stečenih znanja i vještina (ukoliko je kandidat uspješno položio provjere predviđene programom KVE)
  
- opcijski može biti upisan broj bodova na osnovu regulativa udruženja/komora veterinarskih i drugih djelatnika ili ECTS bodova na osnovu regulative određenog studijskog nastavnog programa,
- verifikacija certifikata: datum i mjesto izdavanja, ime, prezime, zvanje, funkcija i potpis voditelja programa KVE i dekana, pečat VFUNSA, te eventualno potpisi i pečati drugih suorganizatora.

Evaluacija i unapređenje kvaliteta programa KVE

## Član 19.

Svi programi KVE podliježu procesu evaluacije i unapređenja kvaliteta .

Evaluacija se uglavnom obavlja putem pisane ankete polaznika i predavača. Kao dodatna evaluacija mogu biti organizovani intervjui polaznika i predavača, fokus grupa ili grupna diskusija.

Anketa polaznika se obavlja anonimno pomoću evaluacionog obrasca KVE kojeg kreira VKVE, a odobrava ODOK. Evaluacioni obrazac sadrži ocjene sljedećih elemenata:

- nastavni materijal i metode,
- sadržaj,
- trajanje,
- organizacija,
- uslovi za rad,
- pojedinačna ocjena svakog predavača,
- evaluacija znanja i vještina,
- ispunjenost očekivanja u pogledu stečenih znanja i vještina,
- samoprocjena uticaja KVE na unapređenje rada polaznika,
- ukupna ocjena programa,
- pisani komentari i prijedlozi za unapređenje kvaliteta.

Ocjene svih elemenata anketnog upitnika su u vidu brojčane skale: 1 (ne zadovoljava), 2 (zadovoljava), 3 (dobar) , 4 (vrlo dobar) i 5 (odličan).

Program i predavači imaju pozitivnu ocjenu ukoliko je prosječna ocjena veća od 3.

Odgovornost za osiguranje kvaliteta svakog programa KVE nosi prvenstveno njegov voditelj, kao i VKVE.

Evaluaciju kvaliteta vrši VKVE nakon svakog završenog programa KVE na osnovu uvida u izvještaj i sve anketne listiće koje dostavlja voditelj programa KVE.

Evaluacija kvaliteta svakog programa KVE, pored kvantitativne analize ocjena polaznika, obavezno uključuje i analizu komentara i prijedloga za unaprjeđenje kvaliteta od strane polaznika.

O rezultatima evaluacije kvaliteta svakog realiziranog programa KVE predsjednik Vijeća za KVE podnosi izvještaj dekanu i ODOK-u.

Vijeće za KVE obavlja posebnu evaluaciju programa i predavača koji dobiju negativnu ocjenu, te definira preporuke za unapređenje kvaliteta, koje dostavlja ODOK-u na razmatranje i saglasnost.

Mišljenje/saglasnost o definiranim preporukama za unapređenje kvaliteta ODOK dostavlja VKVE-u i voditelju programa KVE, s rokovima za njihovu realizaciju.

Program s negativnom ocjenom ne može se ponavljati bez dokumentacije realizacije preporuka za unapređenje kvaliteta od strane voditelja programa KVE koji je dobio negativnu ocjenu.

Verifikaciju ispunjenja preporuka za unapređenje kvaliteta vrši VKVE na osnovu uvida u dostavljenu dokumentaciju i drugih odgovarajućih aktivnosti (npr. intervju s voditeljem i nastavnicima programa i sl.).

Tek nakon provedenih opisanih aktivnosti, VKVE donosi odluku o ponovnom prihvatanju i realizaciji dotičnog programa KVE, te o tome i svim provedenim aktivnostima izvještava dekana i ODOK.

Predavači koji su dobili negativnu ocjenu ne mogu biti učesnici u daljoj realizaciji programa KVE sve do donošenja pozitivne odluke VKVE-a.

Polaznici kontinuirane veterinarske edukacije

## Član 20.

Polaznici KVE mogu biti doktori veterinarske medicine i svi drugi stručni profili i osobe, a koji su ispunili uslove naznačene u prijavi za pojedine programe KVE.

Prijava na pojedine programe KVE vrši se elektronskim ili pismenim putem popunjavanjem obrasca za prijavu učesnika programa KVE.

Obrazac za prijavu sadrži sljedeće elemente:

- ime programa KVE,
- ime i prezime polaznika,
- adresa stanovanja,
- školska sprema,
- ustanova, organizacija (opcijski),
- pozicija na radnom mjestu (opcijski),
- adresa na radnom mjestu (opcijski) ,
- dužina staža (opcijski) ,
- završen fakultet (opcijski - srednja škola) i datum diplomiranja,

- kontakt telefon,
- kontakt email adresa,
- dokaz o uplaćenju kotizaciji (opcijski - ukoliko je predviđena kotizacija),
- dokaz o ispunjavanju posebnih uslova za pojedine programe KVE.

Obrazac za prijavu može, eventualno po odobrenju VKVE-a, imati i dodatne sadržaje.

Finansiranje i prihodi od programa kontinuirane veterinarske edukacije.

## Član 21.

U pravilu, svi polaznici plaćaju kotizaciju za sve programe KVE.

Visinu kotizacije predlaže voditelj programa, a razmatra i odobrava Vijeće za KVE .

Iznimno, sponzorirani programi KVE, ili programi u okviru projekata koji imaju definirane finansijere, mogu biti organizirani bez kotizacije.

Zaposlenici VFUNSA imaju pravo da, bez prethodnog odobrenja Dekana ali uz saglasnost voditelja programa KVE, učestvuju u određenim programima KVE bez plaćanja kotizacije.

U slučaju da je broj polaznika određenog programa KVE limitiran, a postoji interes uposlenika VFUNSA za učešće u istom, prednost imaju polaznici programa KVE koji nisu uposlenici VFUNSA.

## Član 22.

Plaćene kotizacije, dotacije i donacije i sredstva iz spozorstva osiguravaju pokrivanje troškova organiziranja programa KVE.

Dio prihoda svih oblika KVE zadržava VFUNSA za podmirenje troškova organizacije tečajeva (rad Vijeća za KVE, ODOK-a, stručnih službi, korištenje osnovnih sredstava i inventara VFUNSA, režijski i drugi troškovi) i unapređenja nastavne djelatnosti VFUNSA (kupovinu nastavnih pomagala i literature, uređenja nastavnih prostorija).

Raspodjela prihoda ostvarenih realizacijom programa KVE vrši se shodno odredbama Pravilnika o sticanju i raspodjeli vlastitih prihoda Veterinarskog fakulteta u Sarajevu, broj: 01-02-531-1/12. Pri tome, 30% tih prihoda zadržava VFUNSA za podmirenje troškova organizacije tečajeva (rad Vijeća za KVE, ODOK-a, stručnih službi, korištenje osnovnih sredstava i inventara VFUNSA, režijski i drugi troškovi) i

Prijedlog podjele prihoda voditelj programa KVE dostavlja dekanu. Nakon knjigovodstvene podjele prihoda i rashoda, dekan izdaje nalog stručnim službama za isplatu novčanih nadoknada.

VI Završne odredbe

Član 23.

Ovaj Pravilnik stupa na snagu 20 dana nakon objavljivanja na internet stranici

VFUNSA <http://www.vfs.unsa.ba/>.

DEKAN

Prof. dr. Nihad Fejzić

